

Barúwa ya ncholo ya Peéterì Mulongooryo

Barúwa ya ncholo ya Peéterì, yaandikwa ni mutumwi Peéterì. Peéterì aandika barúwa ìhi kati ya myaaka ya 62-67 keende Kirisitù ^avyaalwa. Aandika kwa vaantù ^vamura Yéesu voosi ^veene vajáa viipasa weerwii yoosi. Peéterì avaanirira vaantù ^vasaawulwa ni Mulungu, vayeni kùri ìhi weeru (1:1). Vamanyi va masáare vaséaa, Peéterì aandika barúwa ìhi mpiindi ^ajáa múujii wa Róoma, múuji yeeye ^uayanirira Babéli (5:13).

Peéterì aandika barúwa ìhi kúvaheera mutima vaantù ^vamura Yéesu viime neeja uturikirii ^vaturyáa so muruma Yéesu (1:3-6; 5:10-11). Baa mwiikalo wa Yéesu aha weerwii ni wa uturikiri ujáa. Sa jeyyo, vaantù ^vamura, kari vah-waalale tukù, ni mpaka vatirikire vii. Avasea ko tweera uturikiri, Mulungu avabwéeyya vave na kuruma ^kweene kùri na iyoombe ikulu kulookya saháabu (1:7). Jeyyo, Peéterì avaveera mutima vaantù ^vamura Yéesu vatuube yimirirya sa kuherererya kwa weeru kwaséngerire (4:7, 17).

^Vyeene Kitáabu iki Chagavwa

Nkongojima ya ulamuriri wa Mulungu kwa Yéesu Kirisitù 1:1-12

Mwiikalo ^wabooha na Yéesu ni Iwye ra Nkaasu 1:13-2:12

Ukiindya kwa veenenyumba, vatámwa, vaantù vaki na vaantù valume 2:13-3:7

Wiimiriri ^wiisimiresimire wa k̄r̄i uturikiri 3:8-4:19
 Ukiindya kwa vawosi na vatavana 5:1-11
 Lumbi jo kiimikirirya 5:12-14

Lumbi

¹ Baráwa ihi yafúmire k̄r̄i niini Peéteri, mutumwi wa YéesuKirisit̄. Ni k̄vaandikira niise nyuunyu ^mwasaawulwa ni Mulũungu Taáta, nyuunyu ^mwamyaahika na ^mwiikalaa ja vayeni uko isi ja Póonto, Galatía, Kapadokía, Ásia na Bisínia.

² Mulũungu Taáta avataanga na avasaawula nyuunyu keende aho kali, na ko tweera m̄rimo wa Mutima Mũja, avabwéeyiirye m̄ve vaaja mbere yaachwe. Aya yatumamwa sa m̄ve matu kwa Yéesu Kirisit̄, na yeeye avanyinyirire na sakami yaachwe.✧ Noovaloombera nduwo na mwiikalo m̄ja ^ur̄i foo.

Kuruma ^Kwaréetaa Nkaasu

³ Adũmbwe Mulũungu Taáta wa Yéesu Kirisit̄ Mweenevyoosi wiit̄! Kwa kulaanga na riiso ra w̄ja kwaachwe kukũũ, atubweeyya tuvyaalwe ufya ko mufufula Yéesu kufuma kwa ^vaakwya. Haaha tatiite kwiilaangya ^k̄r̄i nkaasu kwa siku ^jisiina ahero.

⁴ Jeyyo, tookiilaangya k̄hokera nkaasu fuma kwa Mulũungu ira si ^iri koola, au k̄saambuka au kuhirirya, ira ^yavũikwa kurumwii sa nyuunyu.

⁵ Na Mulũungu kwa ngururu jaachwe, yoovĩmirira kwa kuruma kwaanyu, mpaka mahokere uwo ulamuriri ^wahamula ^ur̄i koonekiwa siku jo kiimikirirya.

✧ 1:2 Laanga Vaeburanía 9:18-21.

⁶ Haaha vyeendi sa ntálarya ijo, baa neembe ifaanaa muvisuule mpíindi nkufi ^jookuwa, ko yerwa ^kwiisimiresimire.

⁷ Kuyimirirya kwa kuyerwa uko, koónekyaa kuruma kwaanyu ni kwa kimáári. Kuruma kwaanyu kwayérwaa ja chuuma cha saháabu viintu ^kiyérwaa na mooto. Kumuruma Muluungu kwabooha kulookya saháabu sa yooyo yasúsukaa. Sa jeyyo, Yéesu Kirisitu vaheera ari nyuunyu nkongojima na nyemi, nyuunyu ^mooyimirirya mpíindi ^ari kuuja na ^ari kiivariyula.

⁸ Nyuunyu mwamweenda, baa neembe si munamoona. Baa neembe si munamoona haaha, mwamuruma. Jeyyo mwatiite cheeru cha nkongojima ^chalookerera munamunu,

⁹ sa viintu mwahokera ulamuriri wa nkaasu yaanyu, iyo noo kintu kikuulu cha kuruma kwiitu.

¹⁰ Valáli na mutwe, vajáa valaanga maatuku vii uwo ulamuriri sa vuutaange, vakalaala na mutwe nduwo ya Muluungu ^ng'eene ijáa sa nyuunyu.

¹¹ Mutima wa Masía ujáa na voovo na wavabweeyyáa valaale na mutwe, Masía turikira ari, maa de ave na nkongojima. Avo valáli na mutwe vasaakira maatuku voosaaka vataange masáare aya ni naadi ^yari kuva na ni mweeri ya ani yari kuva.

¹² Muluungu ajáa avoonekyaa masáare ^meene valaaláa na mutwe si sa voovo tuku, maa kaa, ni sa nyuunyu. Na haaha Masáare Maaja aya, yavariyulwa kuri nyuunyu ni vara ^vari luusa kwa njira ya Mutima Muja fuma kurumwii kwa Muluungu. Masáare ayo, noo yara baa mirimu miija ^yeenda kuyataanga.

Kuva Vaaja

¹³ Sa jeyyo, mwiimye neeja miryungu yaanyu, noo kusea, mndookiiyimira, na maviike kwiilaangya kwaanyu kuri nduwo amari hokera mpiindi Yeesu Kirisitu ari variyulwa.

¹⁴ Mwiikale ja vaana va Mlungu na mave matu. Jeyyo, kari murúmaa kutuuba ulaku waanyu ara amujaa nowo mpiindi ja ukoókoyo tuku.

¹⁵ Maa kaa, mave vaaja kwa kira kiintu amutamamaa ja vyeene yeeye Mlungu avaanirira, ari muja.

¹⁶ Masáare Ari Mpeho yalusa, “Mave vaaja sa niini ndiri muja.”☆

¹⁷ Mlungu mumaaniriraa, “Ee Taata,” kati moomuloomba, yeeye noo ari lamirira kira muantu kwa mirimo yaachwe baa kusinanala tuku. Sa jeyyo mave na matu kuri yeeye mpiindi iji amookiikala aha weerwii ja vayeni.

¹⁸ Ni lusa niise jeyyo, sa mwiikalaa mwiikalo awaviha mwapaala fuma kwa vala baaba waanyu. Haaha mwataangire, Mlungu si avanunuula fuma mwiikalwii uwo kwa viintu vihíririryaa baa ja mpia na saháabu tuku,

¹⁹ maa kaa, kwa sakami iri na nkongojima ya Kirisitu. Yeeye aava ni ja muundi ya mporyo iri mpeho isiina lukwaalo.

²⁰ Mlungu amusaawula Kirisitu mpiindi da weeru si inaanda, maa kaa, haaha avariywirwe mpiindi iji jo kiimikirirya sa nyuunyu.

²¹ Kwa njira ya Kirisitu, mwamuruma Mlungu. Yeeye amafufula Kirisitu, maa akamuheera nkon-

☆ **1:16** Laanga Valáawi 11:44-45; 19:2; 20:7.

gojima nkũũũ. Jeyyo, kuruma kwaanyu na kwi-
ilaangya kwaanyu ni kwa Mũũũũũ kũri.

²² Nyuunyu mwajirũũũ nkaasũũũ yaanyu kwa njira
yo va matu kũri ukiindya wa kimááari. Jeyyo,
mwatĩite kwiiyenda kĩndũũũ ^kusiina ukweembi,
haaha iyendi kikomi fuma mitimii yaanyu.

²³ Mwavyaalwa ufya si ja vaana va taáta
^akwĩjaa tukũ, kũri vyoova jeyyo, mwavyaalwa
ni Taáta si ^akwĩjaa kwa siku ^jisiina uhero kwa
njira ya isáare ra Mũũũũũũũ ^rĩri nkaasũũũ, ^rĩri kũva
rimwaari kwa siku ^jisiina uhero.

²⁴ Ja ^vyeeene Masáare ^Yari Mpeho yalũũsa,
“Vaantũũ voosi ni ja masaambi vari,
na nkongojima yaavo ni ja malũva ya isekii.
Masaambi na malũva yanyáamala,

²⁵ maa kaa, isáare ra IJŮVA ni ra kikomi kwa
siku ^jisiina uhero.”✧

Isáare iro noo isáare riija ra Yéesu Kirisitũũ ^reene
mwavariyũũũrũwa.

2

¹ Haaha reki uvi waanyu woosi, uweere,
ukweembi, kivĩna na kwiilongowererya.

² Mũve na mpiĩma na masũũũũũ ya isáare raachwe
ra kikomi, ja vaana vaduudi viintũũũ ^vari na
mpiĩma na masũũũũũ ya vala iyo waavo. Kooni
munywiire masũũũũũ ya mutima, tuuba mũri kũla
fũũũũũ mũlamuririwe.

³ Haaha mwatáangire mbavariri ya Yéesu
Mweenevyoosi ni ^yabooha.✧

Vara ^Vasaawũũũũ ni Mũũũũũũũ

⁴ Yéesu Mweenevyoosi ni iwye ra nkaasu. Iwye iro ro jeengera ^rakwáataa nyumba, vaantu varisiita, maa kaa, Mulungu arisaawula na ni ra iyoombe ikulu kwaachwe. Museesereri Yéesu,

⁵ na nyuunyu kuva muri mawye ya nkaasu ^meene Mulungu yoojeengera nyumba ya mitima, kei muri veeneisi vaachwe vaaja. Mundootoola mpóryo ja mutima jira ^jimweéryaa Mulungu mutima kwa njira ya Yéesu Kirisitu. ⁶ Sa Masáare ^Yari Mpeho yalusa,

“Laangi vika niise iwye uko Sayúuni,
iwye ikulu ra kichurii, ^narisaawula na ra
iyoombe ikulu.

Na yoyoosi ^ari riilaangya,
si ari kwiivairya mbiri tuku.”☆

⁷ Sa jeyyo, nyuunyu ^muriiláangyaa mwahumula kooni iwye iro ni ra iyoombe ikulu, maa kaa, kwa vara si ^variiláangyaa,

“Iwye ^rasiitwa ni vajeengi,
ravire iwye ra kichurii.”☆

⁸ Na kei,

“Iwye ^ribwéeyaa vaantu viikunguvale,
na mwaalaliwye ^uri hitahita vaantu.”☆

Vookiikunguvale sa si varuma rira isáare tuku, ja vira ^vyeeene viimiriwa neeja keende aho kali.

⁹ Maa kaa, nyuunyu Mulungu avasaawula mave lukolo lwa vaantu vaachwe, veeneisi va kitemi, isi njija, kei ni vaantu vaachwe Mulungu mweenevyo. Mwaanirirwa sa mvariyele

☆ **2:6** Laanga Isáaya 28:16. ☆ **2:7** Laanga Sabúuri 118:22. ☆ **2:8** Laanga Isáaya 8:14.

mirimo yaachwe miija. Yeeye avaanirira fuma kilwiiryii sa mwiingire na kiweerwii chaachwe ^chabooha.*

¹⁰ Aho ncholo, nyuunyu si mujáa vaantu va Mulungu tuku, maa kaa, haaha mari vaachwe. Kei si mujáa munaturya riiso ra wuja ra Mulungu tuku, maa kaa, haaha mwaturya riiso ra wuja waachwe.*

¹¹ Vijeengi vyaani naveenda. Noovaloomba nyuunyu ^mari vayeni na valooki va aha weerwii, nehi uláku wa maviri uhu ^walwijaa nkoondo na nkaasu yaanyu.

¹² Mundootumama mirimo miija mbere ya vaantu si ^vamumányire Mulungu, sa kooni voosea nyuunyu ni vaantu ^mubwéeyaa uvi, voone viintu vyaanyu ^vyabooha na vamanyemye Mulungu siku ^ari kaja.

Kunyemya Valongooli Voosi

¹³ Sa Mweenevyoosi, mave matu kwa wiimiriri ^wavikwa ni vaantu, kooni mutemi noo mukúúlu,

¹⁴ au kooni amuvika gávana. Sa mutemi avatuma vandoovalaira chiiru vara ^vatumamaa uvi na vavadumbirire vara ^vatumamaa viija.

¹⁵ Mulungu asáakaa mutumame maaja, sa mudungye milomo ya kikoókoyo ya vaantu vahoho.

¹⁶ Ikali ja vaantu ^vari na uhúuru, maa kaa, kari mundootumia uhúuru waanyu ja kiintu ^chookunikirira uvi waanyu tuku, mwiikale ja vaantu ^vamatumamiraa Mulungu.

* **2:9** Laanga Ufumo 19:6; Isáaya 43:20-21. * **2:10** Laanga Hósea 2:23.

17 M̃nyemyi kira m̃untu, veendi vaantu
^vamura Yéesu Mweenevyoosi, moofi
M̃lungu na m̃nyemyi m̃temi.

18 Nyuunyu vatamami, m̃ve matu kwa
veenekaaya vaanyu kwa nyemi joosi, si vara
veenekaaya ^vahola vii tuku, baa vara ^vahumba.

19 Iki noo ^kimweéryaa M̃lungu m̃tima,
m̃untu kuyimirirya uturikiri k̃ñ yookoonerwa
sa m̃tima ^wiísiman'yaa mavi na maaja wa
M̃lungu.

20 Ni k̃náálo che kwat̃ite kutamama ^vyaviha
na muturikiriwe? Maa kaa, kooni mooyimirirya
uturikiri sa mwatamama maaja, iki ni k̃intu
^kimweéryaa M̃lungu m̃tima.

Kuturikira Hamwi na Kirisitu

21 Moosaakwa muyimirirye jeyyo, sa baa
Kirisitu mweenevyo aturikiriwa sa nyuunyu.
Jeyyo, avarekera k̃intu cho vabweyya nyuunyu
mumutuubirirye.

22 Yeeye si abweyya uvi tuku, na uweere si
woonekana fuma m̃lomwii waachwe tuku.☆

23 Yeeye ^akatukirwe si ahindurira kituki tuku,
^akaturikiriwe si avumba tuku, maa kaa, yeeye
iivika kwa ura ^alámula kwa uwoloki.

24 Yeeye mweenevyo asumula uvi wiit̃a muvirii
waachwe mweeri ya m̃ti, kwa njira iyo, taakwa
kwa viintu vya uvi, tudahe kwiikala kwa uwoloki.
Ko vawa kwaachwe, nyuunyu mwahoriwa.

25 Nyuunyu majáa mwatuuba rimira ja muundi,
maa kaa, haaha mwam̃válandukire Murísi na
M̃laangiriryi wa nkaasu yaanyu.

☆ 2:22 Laanga Isáaya 53:9.

3

Ukiindya kwa Vaki na Valume

¹ Kwa njira yiiyo, nyuunyu vaki mwiikiimye na isi ya valume vaanyu, sa kooni vamwaari vara si ^vamura Yéesu, varutwe ni mwiikalo wa vaki vaavo baa isáare tuku,

² ^vari laanga mwiikalo waanyu wa kikomi na wa nyemi.

³ Kwiibohererya kwaanyu kusive kwa weerwii vii, baa ja kusuka njwiri, kwiivikira viintu vya saháabu na kwiirwika ingo tuku.

⁴ Maa kaa, kwiibohererya kwaanyu kave kwa wuntu waanyu, kubooha si ^kusáambukaa na kutuula kwa mutima, kura ^kuválwaa kiintu cha kikomi mbere ya Muluungu.

⁵ Jeyyo, noo ^vyeene viibohereryáa vaantu vaki vaaja va kali vara ^vamwiilaangyáa Muluungu. Avo viibohereryáa ko vateera valume vaavo.

⁶ Baa ja Sáara jei, amunyemyáa mulume waachwe Aburaháamu na amwaaniriráa mweenenyuumba. Haaha nyuunyu mavíire vaana va Sáara, kooni mubwéeyiirye viija bila yo koofa kiintu chochoosi.

⁷ Viivyo nyuunyu valume, mwiikale na vaki vaanyu kwa nyemi, kuntu mootanga vaki vaanyu ni teketeke ^vari. Kei mündoovalaanga na nyemi, sa Muluungu avalaha voosi hokera muri nduwo ya nkaasu ^avaheera. Na aho, kaloomba kwaanyu si kari hitwahitwa tuku.

Kuturikira ko Tumama Wujja

⁸ Kukiimikirirya, raanyu rive rimwi, mändookiiyonera mbavariri, mwiiyende kindu,

mave ^mwahola na mündookikiimya na isi kati yaanyu.

⁹ Kündoohindurira uvi kwa uvi tuku, au kituki kwa kituki tuku, maa kaa, nyuunyu hinduriri ntálarya. Ikyo noo ^cheene Muluungu avaanirira mündootumama sa mñhokere ntálarya.

¹⁰ Sa Masáare ^Yari Mpeho yalusa,
“Mñntu yoyoosi ura ^yoosaaka kwiikala vya-booha na ave na cheeru,
areke lusa vaantu, na uvaangu.

¹¹ Ni mpaka amanyike kureka uvi, atumame wñja, asaakire mwiikalo mñja na atuube kiikala nowo.

¹² Sa miiso ya Mweenevyoosi,
yavaláangaa vara ^vabwéeyaa uwoloki,
na matu yaachwe,
yatéereraa kuloomba kwaavo.

Maa kaa, vara ^vabwéeyaa uvi,
avahéeraa ikochi.”☆

¹³ Ni ani ^ari vabweeyirya uvi kooni kira mpiindi moomanyika na mitima yaanyu kutumama wñja?

¹⁴ Maa kaa, kooni mñri turikiriwa sa uwoloki ^mñri nowo, nyuunyu mwatalariwa ni Muluungu. Jeyyo kari mñvoófaa vaantu au kwñngira kivundu mitimii yaanyu tuku.

¹⁵ Maa kaa, mabweeyiriyi nkongojima Kirisitu, yeeye ave Mweenevyoosi mitimii yaanyu. Sikñ joosi, mave mwñmire neeja kuuyirya mñntu ^ari vuurya kwiilaangya kwaanyu kñra kñri nyuunyu. Mündoobweeyya jeyyo kwa kñhola na nyemi.

☆ 3:12 Laanga Sabúuri 34:12-16.

¹⁶ Naanyu mave na mitima myeeru si ^itwáalwaa na kiloongii, sa yara masáare ^voovalongowererya nyuunyu na mwiikalo waanyu muuja ko kundikaniwa na Kirisitu, vakwaatiwe soni so valongowererya.

¹⁷ Ni luusa niise jeyyo, sa ni pwee kuturikira so tumama wuuja, sa kooni kuturikira uko noo ^cheene Muluungu asáakaa, kulookya kuturikira so tumama uvi.

¹⁸ Sa Kirisitu ne aturikiriwa kamudu vii sa uvi, mawoloki sa vara si ^vari vawoloki, sa avareete nyuunyu kwa Muluungu. Muviri waachwe ukulawa, maa kaa, akafufulwa, akava nkaasu kwa njira ya Mitima.

¹⁹ Kwa jeyyo, atamanya noo kuvariyurira mitima ya vaantu haaha ^iri manyololwii.

²⁰ Vaantu ava si vajáa matu tuku aho kali mpindi Muluungu ^awoojeráa ko yimirirya siku jira ja Nuhu mpindi safiina ^yatengeneshiwáa. Na aho safiinii vaantu vake vii, noo kusea vaantu vanaani valamuririwa ko tweera maaji.

²¹ Na ayo maaji yoónekyaa ubatíiso ^mweene haaha woovalamurirya baa nyuunyu siku iji, si ko seyya kosu muvirii tuku, maa kaa, ja kulaha kwa mitima myeeru, si ^itutwáalaa na kiloongii mbere ja Muluungu, kwa njira ya kufufuka kwa Yeesu Kirisitu.

²² Yeeye atamanya na kurumwii na iikala mukono wa kulame wa Muluungu, na mirimu miija, na wiimiriri na ngururu joosi javiikwa isi yaachwe.

Mwiikalo ^Wamweéryaa Mutima Muluungu

¹ Haaha, sa viintu Kirisitu aturikira muviri, baa nyuunyu moosaakwa murume kuturikiriwa, kunu mookwaatya muryuungu waachwe ^ajaa nowo. Sa muuntu ^aturikira muvirii waachwe, iireka na uvi.

² Kwaandira haaha, mwiikalo ^wachihire aha weerwii, woosaakwa ulongoolwe ni vira ^vyeene Muluungu asákaa, na si kwa uláku wa kiwuuntu tuku.

³ Sa siku ^jilóokire, mujaa mwatiite mpiindi jo toosha jo bweeyya yara ^meene vaantu si ^vamumányire Muluungu veenda kutumama, vara ^vayéendaa ja kúri, ^vari na uláku, ureevi, ^vabwéeyya ngovi ja kiláku, viintu ^viréevyaa, vina mbi na kwiinamira vidabalaíyo kintu kivi mbere ya Muluungu.

⁴ Sa jeyyo, voohwaalariwa koona nyuunyu si mootumbuujja hamwi novo kei tuku uvii, na sa jeyyo voovatukira.

⁵ Maa kaa, voovo kwiilusira vari vooveene kwa Yéesu Kirisitu, yeeye ^ahumula kwiima neeja kavalamurira ^vari nkaasu na ^vaakwa.

⁶ Na iki noo ^chabweeyya Masáare Maaja yavariyulwa baa kwa vara haaha ^vaakwa, sa valamurirwe kuri miviri ja ^vyeene vaantu valámurirwaa, maa kaa, vave na nkaasu ja ^vyeene Muluungu ari kwa ngururu ja Mutima waachwe.

Kujja kwa Yéesu Kwaséngerire

⁷ Kuherererya kwa viintu vyoosi kwaséngerire. Sa jeyyo, mave na tooti na mndookiiyimira

mpiima jaanyu sa mūdookeesha chiriri chobu mooloomba.

⁸ Kuloonya vyoosi, mūdoomanyika kwiiyenda sa kwiiyenda, kwakunikirira a vi ^uri foo. ☆

⁹ Mūdookiiteengya nyuunyū kwa nyuunyū, baa kwiing'urira tuku.

¹⁰ Muluungu noo avahéeraa nyuunyū vaantu ^vamura wūya. Na kira mūntu atumie ūwo wūya kuvaainga viingi ja viimiriri va nduwo ^jiisimiresimire ja Muluungu.

¹¹ Mūntu yoyoosi ^yoosaaka lūsika ni alūsike ja yoolūsika masáare ya Muluungu meeneevyo. Yoyoosi ^yootumama, ni atumame kwa ngururu ^aheewa ni Muluungu, sa Muluungu abweyyiriwe nkongojima kwa kira kiintu kwa njira ya Yéesu Kirisitu. Nkongojima ni na yeeye jiri siku kwa siku ^jisiina ūhero. Kikomi.

Kuturikira so Muruma Kirisitu

¹² Vijeengi vyaani naveenda. Kari mūhwáalariwaa ni ūsūngu wo yerwa ^moopata ja moopata kiintu kiyeni tuku.

¹³ Maa kaa, eryi mitima sa moova hamwi na Kirisitu uturikirii waachwe, sa mūve kei na cheeru kikulukulu mpiindi nkongojima yaachwe ^iri variyulwa.

¹⁴ Kooni mūri tukirwa sa irina ra Kirisitu, mwatalariwa, sa Mutima wa Nkongojima noo kusea Mutima wa Muluungu, ni mweeri yaanyu wookiikala.

¹⁵ Kari kave na mūntu ūmwi kari nyuunyū ^mweene ari saakwa aturikire sa ni mūalai, mwiivi,

☆ 4:8 Laanga Mpíri 10:12.

mũntu ^abwéeyaa uvi au ^alóngowereryaa vaantu tuku.

¹⁶ Maa kaa, kooni mũntu atúrikiire sa amuruma Kirisitu kari oone soni tuku. Mudũumbe Mũlungu so kaanirirwa weewe ni mũntu ^umutúubaa Kirisitu.

¹⁷ Mpiindi ja ulamu jafíkire na Mũlungu kaanda ari lamurira nyuumba yaachwe, noo kusea, vaantu vaachwe. Haaha kooni ari kaanda na suusu, ha de vara ^vasiita Masáare Maaja ya Mũlungu uhero waavo si uri kuva wo koofya maatuku vii tuku wuu?

¹⁸ Ja ^vyeene Masáare ^Yari Mpeho yalũsa, “Kooni vyafafa vaantu vawoloki kulamuririwa, ni jooli viri kuva kwa vaantu si ^vatúubaa kira Mũlungu ^asáakaa na kwa vavi?”☆

¹⁹ Sa jeyyo, vara ^vooturikira ja ^vyeene asáakaa Mũlungu, viivike kwa Muumba waavo, yeeye ni wo kiilaangiwa, na vatuube tumama maaja.

5

Ukiindya kwa Vawosi na Vatavana

¹ Haaha ni lussika niise na nyuunyū vawosi va vaantu ^vamura Yéesu. Nini ni moosi mwiiwaanyu na mũntu ^oona uturikiri wa Yéesu Kirisitu. Kei nini ni hamwi ndiri nkongojimii ^iri kunukulwa. Ni kuvakalaamya niise,

² riishi neeja mpuka ^ng'eene mwakwaatiwa ni Mũlungu. Mave valaangiriri va iyo mpuka kwa matima mweeru ja ^vyeene Mũlungu yoosaaka, na si koodoomereriwa tuku. Tumami si kwa

☆ 4:18 Laanga Mpíri 11:31.

mpíima ya mpíá tukú, maa kaa, kwa mutima waanyu woosi.

³ Kari mave vakari kwa vaantu ^moovalongoola tukú, maa kaa, mave vo tuubiririwa kari mpuka.

⁴ Mpíindi Murísi Mukúulu ^ari kúja, hokera mari itáaji ra nkongojima si ^risáambukaa.

⁵ Viivyo nyuunyu ^moolongoolwa, mandoovanyemya vawosi. Nyuunyu voosi itumamiri ko kiikiimya na isi, sa Masáare ^Yari Mpeho yasea,

Mulúungu avakítiraa vara ^viívaa kipeembe,
maa kaa, avahéeraa nduwo vara ^viikíimya na isi. ☆

⁶ Sa jeyyo, ikiimyi na isi kwa Mulúungu ^ari na ngururu joosi, sa aviinule mpíindi ^íisaawula.

⁷ Muvikiri uturikiri waanyu woosi sa yeeye avaláangaa nyuunyu.

⁸ Mave na tooti na mwíime neeja. Mavi waanyu, Ikúulu ra Mirimu Mivi, rimwaari rooringirira ja siimba ^yoosaakira muuntu sa imumerye. ⁹ Iro risi-iti na mwíime neeja kari kuruma kwaanyu, kuu mootaanga uturikiri wuuwo turya viise vanduu vaanyu kari weeru yoosi, turikira viise jeyyo.

¹⁰ Maa kaa, Mulúungu ni wa nduwo joosi, yeeye avaanirira na nkongojimii ya siku ^jisiina uhero ko kundikaniwa na Kirisitu. ^Muri hamula kuturikira kwa mpíindi, yeeye mweeneevyo vakiiman'ya ari, vaambirirya ari, vaheera ari ngururu na vavika ari mwaarirywii wa kikomi.

¹¹ Kari yeeye jive ngururu kwa siku ^jisiina uhero! Kikomi!

☆ 5:5 Laanga Mpíri 3:34; Yaakúupu 4:6.

Lumbi jo Kiimikirirya

¹² Navaándikiire barúwa ihi kwa nyambirirya ya Siliváano, mwaaniitu ^nimwiiláangyaa. Noosaaka nivaheere matima na nivawyiire kikomi kira ^cheene mookipata, ni nduwo ya Mulungu. Ikali neeja kari nduwo iyo.

¹³ Vaantu ^vamura Yéesu aha Babéli ^veene vasaawulwa hamwi na nyuunyu, vavalúumbiirye. Kei, mulúumbiwe ni Maáriki mwaana waani.

¹⁴ Mündookiiluumbya ko kiisundira ja ishára ^iláira mwiiyenda ko muruma Kirisitu.

Mwiikalo muja uve na nyuunyu ^mari kwa Kirisitu.

Rangi **Rangi Translation Project (New Testament)**

copyright © 2023 Wycliffe Bible Translators, Inc.

Language: Rangi

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-08

PDF generated using Haiola and XeLaTeX on 7 May 2025 from source files dated 8 May 2025

f1dc5da6-bc39-5ea5-ac13-942132b5feb6